



FIXA TEMÁTICA N. 8

Soberania Ai-Han mak garante seguransa ai-han iha Timor Leste

INTRODUSAUN

Timor-Leste hanesan nasaun soberania ida ita tenki hanoin dezenvolve rasik ita nia sistema agrikultura no politika ai-han, ne'ebe mak bazeia ba nesiedade povu nian, kultura, no meu-ambiente, nune konseitu soberania aihan sai hanesan konseitu alternativu ne'ebe besik liu ba situasaun sosioekonomiku no kultura Timor leste nian ne'ebe presiza opta ba futuru. Nune Hasatil hare katak Atu hametin soberania ai-han iha Timor-Leste, halao ona serbisu importante sira balun ne'ebe sai hanesan mos Plata Forma luta organizasaun nian maka hanesan :

a. Defende Agrikultura Sustentavel no agroekolojia

Hasatil promove no defende agrikultura sustentavel nuudar plata forma ida atu soberania ai-han bele metin no forte liu tan, rai ida idak tenke dezenvolve no proteze agrikultura sustentavel hodi garantia direitu ema hotu asesu ba hahan, proteje sira nia meu ambiente no proteje an husi *dumping* (hahan ho folin kiik). Sira mos tenke bele sustenta sira nia agrikultura hodi halao sira nia knaar depende ba rai ida idak no ninia tradisaun no kultura.

Servisu hametin agrikultura sustentavel no agro-ekolojia bazeia ba : Haberan matenek lokal no skill lokal sira: Dezenvolve matenek lokal/tradisional no esperiensa ne'ebe agrikultor sira iha liu husi pratika diversifikasaun agrikultura, Servisu ho natureza; liu husi Potesaun ba ambiente liu husi promove kultura Tara-bandu, Lokaliza sistema ai-han: liu husi mantein produsaun agrikultura ne'ebe la para (produs ai-han tuir tempu kada tinan) iha nivel uma kain (agrikola familiar),Promove protesau ba fini lokal no organiku; liu husi kria banku fini lokal (hakiak no habarak fini lokal), Halo desizaun tuir lokal: liu husi Promove Uza pratika agrikula ne'ebe adapta lokalmente(kultura rotasaun, konservasaun rai, kaptasaun no jestaun bee nian, kompostu organiku, fini no variedade tradisional no laos uza fini GMO (organizmu genetikamente modifikadu).

b. Promove merkaduria lokal no komersiu justu ba agrikultor sira

Problema agrikultor sira la iha asesu ba sira nia merkadu rasik, tanba folin sira nia produitu uitoan liu no sira hasoru *dumping* husi produitu importasaun. Tan nee Hasatil ho nia membru durante nee promove merkadu lokal hodi hakbesik entre produsaun no konsumu, liu husi habadak korenti komersializasaun nian, hamenus kustu ba tranzasaun no oportunidade ba produitu agrikultor ne'ebe iha folin ne'ebe justu liu (merkaduria justu). Kria merkadu lokal no hakbesik ba produtor no konsumidor liu husi redi komersiu lokal (asosiasaun no koooperativa produtor no konsumidor sira iha baze), halo prosesamentu ba aihan lokal sira ne'ebe iha valor diak ba saude no merkadu hodi hasae rendimentu, promosaun faan direita liu husi organiza feira popular sira konaba ai-han lokal no kompetisaun ruma konaba oinsa mak tein ai-han tradisional Timor-Leste nian regularmente iha nivel lokal too nasional no ba oin atu promove kompra institusional liu husi governu ba produtor ezemplu ba programa ai-han ba merenda eskolar ka kantina institusaun publiku sira nian hanesan hahan ba forsa no polisia sira no ospital sira.

c. Direitu kampones sira aksesu ba rai

Durante nia ezistensia HASATIL hamutuk ho organizasaun kampones sira iha baze promove no defende nafatin politika reformasaun agraria hodi garante direitu toos nain sira ba rai no oinsa toos nain sira bele hetan aksesu ba rai hodi halo produsaun no garante distribusaun produitu, husi prosesamentu to merkaduria hodi hametin toos nain soberanu. Liu-liu Redistribusaun plantasaun kafe sira iha distritu Ermera no dsitritu seluk ne'ebe mai husi iniciativa toos nain sira. Iha distritu Ermera plantasaun kafe boot sira 26 mak agora dadaun iha ona toos nain sira nia liman hodi maneja.

d. Forma Aliansa no Redi Servisu

HASATIL durante nia ezistensia hahu iha tinan 2002, halo ona serbisu advokasia ba politika nasional no global ba asuntu agrikultura no direitu agrikultor sira iha nivel nasional no regional liu husi forma aliansa no redi serbisu ho organizasaun oin-oin. Hasatil hanesan membru La Via Campesina nuudar organizasaun mundial toos nain kiik sira ne'ebe nia membru namkari iha nasaun 80 resin iha mundu tomak.

Iha nivel nasional kria aliansa ho MOKATIL (Movimentu Kamponezes Timor Leste) ne'ebe forma husi ativista membru redi Hasatil hamutuk ho membru grupu agrikultores no asiasun agrikultores husi distritus harii iha Tinan 2012 hodi troka HASATIL hanesan membru Via Campesina iha Asia Leste, Asia de Sul no Asia Pasifiku. Atu atinji objetivu ne'e persiza rede kolaborasaun no solidaridade entre governu, sosiedade sivil, no agrikultor sira ne'ebe permite jestaun rekursu lokal sira (inklui rai, bee, fini no biodiversidade) iha tempu oin mai.

e. Advokasia ba Politika Neo-liberal sira ne'ebe halo at soberania ai-han

HASATIL mos ativamente iha kampanha kontra Politika neo-liberal sira ne'ebe fo prioridade ba komersiu internasional, laos atu fo han ba povu sira. Politika sira nee la fo kontribuisaun ida atu halakon hamlaha iha mundu. Politika sira nee halo povu nia dependensia ba importaun produto agrikultura sai makaas liu, no haforsa industrializasaun agrikultura neebe estraga patrimoniun jenetiku, kultural no meu ambiente, no mos estraga saude ema nian. Politika sira nee obriga agrikultor barak atu para ho agrikultura tradisional no halai ba sidade ka ba fatin seluk.

Tan ne'e Hasatil hamutuk ho nia membrus hamoris diskusaun sira iha nivel Suku mai to'o nasional entre governu, sosiedade sivil no povu sira kona-ba sistema hahan no agrikultura povu no hamosu inisiativu no aksaun lokal to nasional, hodi koaliala maka'as konaba problema rai, fini lokal, aksaun kontra introdusaun fini no *dumping* hahan mai husi rai seluk.

TAMBA SA POLITIKA SOBERANIA AI-HAN IMPORTANTE?

- Fo prioridade ba prosusaun agrikultura lokal hodi fo hahan ba povu, fo asesu ba agrikultor sira ba rai, bee, fini no kreditu. Tanba nee presiza halao reforma agraria, luta kontra OGM (organismu jenetikamente modifikadu - transjeniku) hodi hetan asesu ba fini no presiza rai no bee nudar buat ida publiku, ne'ebe tenke fahe diak ba ema hotu-hotu.
- Direitu agrikultor sira atu halao produsaun hahan no direitu konsumidor sira hodi desidi saida mak sira hakarak hola no se no oinsa produz produto nee.
- Direitu estadu sira hodi halao protesasaun kontra importaun produtu agrikultura no hahan ho folin kiik liu (*food dumping*).
- Folin produtu agrikultura tenke bazeia ba kustu produsaun: nee bele halao se estadu sira iha direitu atu fo tasa ba importaun ho folin kiik liu, fo tulun hodi dezenvolve produsaun agrikultura neebe sustentavel no kontrola produsaun ba merkadu internu hodi la hetan "esedente estruktural" (produtu ida neebe bainbain hetan produsaun barak liu).
- Partisipasaun povu sira hodi desidi politika ba agrikultura no rekoñesimentu ba direitu kampones sira, tanba sira mak iha papel importante liu iha produsaun agrikultura no hahan.

Hamutuk ita luta ba soberania aihan iha Timor Leste!

Autór: KSI

Publikasaun ne'e produzir ho apoiu husi União Europeia. Ho konteudu eksklusiva ba responsabilidade HASATIL no mos labele, iha kasu ruma, konsidera nudar expresaun ba posisaun União Europeia"

Projetu Asistencia Teknika no Haforsa Kompetensia HASATIL nian no Organizaun Sosiedade Sivil ba Dezenvolvimentu Rural iha Timor Leste (FED/2012/284-340)

